

## Pɔl saba kaplāŋ Filipefa ye

### *Syaha fla*

<sup>1</sup> Wii mpāy too ma Yesu Crise tēntē-, ndoo Pɔl tesē Timuti ne, wii me too saba nwo yrūhū nɔ wāā. Wo u yrūhū nɔ wāā yii Filipefa mpāy bye kē, tee yii le soho Yesu Crise koho wo, yii ma suhu ye Yesu kāndeyārfa yahaseefa ne tesē pe koholefa ne ye yahaseefa ye.

<sup>2</sup> Wo Tuhufua Yāhā tesē wo Yīnfua Yesu ne, ke ke kayīi wāā ye kē tesē ke yrīŋ ne.

### *Pɔl Yāhā nar Filipe Yesu kāndeyārfa wīi na*

<sup>3</sup> Yalebye, n ma ye wīi ga, n ne syaha wāā Yāhā kē ye bye wīi na.

<sup>4</sup> Yalebye, n ma nii n pāā Yāhā ne ye wīi na, le ma ne nii ra ye nuhu wīi.

<sup>5</sup> Ye sē yāā, ma gbe per gii na tee le Yesu kapāyīi wīi sya, ma sya ba waa nanga na, ye sē yi kāā le kur ye ye; ye maha koho le ra ye le wāpāātay wīi na teebɛɛ bye wo, koo kē.

<sup>6</sup> N le cā laha, Yāhā kayīi lii wāpyeŋ koho yigi ye laam wo, ke ga le pye ga kua ye bye kē, Yesu Crise n cā pa.

<sup>7</sup> -Ye yāŋ, ye wīi yai le gboho ra laam wo. Ye wīi -sē gboho ra laam wo cīinde. Ye sē yāā, Yāhā ke kayīi lii wāā ra kē, ye bya taha le na. Ma gbe cāā gii cāā na, tē le Yesu kapāyīi tēn koho yigi ye

fla na, ma sya ba waa yagaa na, tē ma nwompihi wo. N sē naa n sya le kapāyī wāwlāhā wī na ye, ma naa nawee- yar, le ma cīinde, ma naa pe le le wo.

<sup>8</sup> Yāhā ɛ cā cīinde ne tē n pāā ma yee, ye ntāŋ dye gboho ra tāy. Yesu kē u ra ta ke syi.

<sup>9</sup> Tē Yāhā nar ye kē lii ne, le nde: Kaa ke naa n taha Yāhā ntāŋ wādyen na ye tāy, tesē ye maha cīinde kai- cā ye ke war naa n yō.

<sup>10</sup> Loo ga waha ye ta, ye n wāyī cā wāpee ne, ye naa wāyūhū pye. U Yāhā Yīndefua Crise durbaper, ye ga ba nii gbegbe, kapee laa saa pye ye yīŋ na ye, waa saa ba wāpee laa yāā ye wī na ye.

<sup>11</sup> Yesu Crise kāmāy na, kai- nkāy ke sron, ye ga naa koo pye Yāhā miingbāŋ n yi, nawee- bye n naa ke gboho.

### *Yesu Crise woo, u ma cīinde yrā*

<sup>12</sup> Wo nna, yii mpāy tee n yār Yesu kānde wo, n n traha ye le cā ye yee, lii le ra dye nde, loo ɛ maha nii yīŋ, nawee- busāā n le Yesu kapāyī wī cā.

<sup>13</sup> Ye sē yāā, mpāy pe ke klo yīnfua kangbāŋ sēŋ tesē nawee- mpāy bye ne pe ra wī luhu, pe bye le cā tāŋ ma cā, n tēn tē u Yāhā Yīndefua Crise kē. Pe cā u Crise tēn wī ne tē ma nwompihi wo.

<sup>14</sup> Yesu kāndeyārfa mpāy pe ra yāā nwompihi wo, loo nde poo busāā ta, pe n nii kaa taha pe koho wātahayaha na Yīnfua Yesu na, ma maha nii kaa taha le Yesu kapāyī wāpāā na nawee- ye, pe sē n fya ɛ fya ye.

15 Poo nanem mpây -sê ra laanyar yigi, ma nii Crise wĩĩ pãã kaa ter syi, ma nii ra yẽ yigi. Mpây -sê ma, pe Crise wĩĩ pãã laanyõm ne.

16 Ta ntãŋ dye poo tãŋ, koo kē. Pe cã, Yãhã ra taha le Yesu kapãŋĩĩ na ma yee, n ma n naa n sya le wĩĩ ne ye.

17 Mpây pe -sê ra laanyar yigi, pe ma sya Crise wĩĩ pãã, pe n ke pe pe ya tyĩn ra ne. Pe maha n ke, pe kaa taha ra wãfãŋ na ke nwompihi laam wo.

18 Nkãy poo naweepee- mii pe n pye, le sê ra gbe ye. Le tãŋ, pe wãpee ga ra wĩĩ na woo, pe wãŋĩĩ ga ra wĩĩ na woo, pe Yesu kapãŋĩĩ loo pãã n wa, loo nde nuhu le ra laam wo, nanga tesê sukũhũ ne.

19 Ye sê yãã, n cã ma yee, ye Yãhã wãnar kãmay na tesê Yesu Yrã koho wãleŋ ne ra ye, n ga ba wloho yi koo ngĩĩ bye laam wo.

20 Tê loo cã wa, ma koho taha yaha le na ta laam bya ne, fyar saha ra yigi laa ne ye. Tê ma ge ma na, laanyĩn mpây pe ma ra laam wo, wãkuayãã wãm sê me pe ne ye. Loo na, n ma yrãŋ woo, n ku woo, n le cã laha, nawee- ga u Crise miingbãŋ cã ra kãmay na.

21 Ye sê yãã, n ma kuee yrãŋ na, u Crise woo u ma ra kãnkai- bye. N ma ku, le ga nii ra ye kayĩĩ.

22 N ma -sê yai n kuee yrãŋ na, n tẽn laa tẽ ga yaha ye u Crise myaha na, le bya ma wãŋĩĩ. Koo katε- syãŋ ngĩĩ laam wo, tẽ ga lii yãŋ gbe, n sê le cã ye.

23 Le ma mii, n ma katε- syãŋ nsoho wo. N ma ga waha ne yi kãã driyẽ nge wo, n ga nii Yesu tãŋ, loo le ne ga tãŋ ra ye.

24 Lii le puar, n kuee driyẽ laam wo ye wĩ na, loo le ma yĩŋ.

25 Loo ne tẽ ga yigi. N cã n ga kuee yrãŋ na. N cã n ga kuee ye ne, n naa koho le ye ye, ye n naa nuhu yãã Yesu kur ye, ye naa kaa taha u wãtan na ye Yater.

26 Loo na, n ma maha ba dur ga ye fla na, le ga ba nii ye ye yĩnkuâyir wĩ, ye troho wãtãhã na Yesu kãnde wo.

*Ye troho wãtãhã yai ke wãã le le Yesu kapãyĩ wũhũ ne*

27 Lii le ma yĩŋ, ye tyii ye troho wãtãhã ter n wãã le le Yesu kapãyĩ wũhũ ne. Loo na, n ka maa ye yãŋ woo, n sẽ yãã ka ye woo, n ga cã, ye yii plãhã kuee le Yesu kãnde wo. N ga maha cã, ye bye, ye wãã le yĩmbui nen na, ma yer laantee nen na mii naan dyaŋ tee ga miy Yesu wãta Yater wĩ na. Le kapãyĩ loo le wo laam wo.

28 Ye ma syi ye fya ye napĩ- na laa ge ne ye. Ye ma pe yẽ nder, le ga nii kayar dyaŋ, Yãhã pe yar ma yee, pe n gaha pe ya wĩ klahasaha wo, ma -sẽ yii yar ma yee, ye n gaha ye wãsyayaha saha wo. Yãhã wĩ ne loo ne.

29 Ye sẽ yãã, Yãhã kayĩ wãã ye kẽ ma ye ta, ye n Yesu ta ye Yater; loo ya sẽ ne ye, ke maha ye ta ye n wãfã yãã Yesu kur ye. Yãhã wĩ ne loo ne.

30 Yagaa, ta tẽn laam wo, sesrãr rii tẽ naa n srã, ye bya dye ra kue ye too sesrãr nen ya ne. Tee naa ra yãã sesrãr rii na faale wo, too ne. Ye maha cã ma yee, too sesrãr ya ne tẽ n srã ma sya ba waa yagaa na.

## 2

*-Ye yii tege tãã ye Yesu Crise wãñ syi dyañ!*

<sup>1</sup> Tee seefar le u Yãhã Yĩndefua Crise ne, ye sē cã la ma yee loo nde ye laam yĩn? Ye ntãñ pe dye u tãy, ye sē cã la ma yee loo nde kaa taha ye fãnga na? Yãhã Yrã le ma ye laam wo, ye sē cã la ma yee ye ma yĩmbui nen na le ne? Ye sē cã la ma yee ye ntãñ dye yii tãy, ye n nii kayũhũ pye yii kē?

<sup>2</sup> Koo kai- ngĩ wĩ na, n ga laa nar ye ye: -Ye yĩmbuhu wãã le, ye tyii ye bye ntãñ n dye yii tãy, ye n naa n nii laantee nen ne, ye naa kate nen ya kar! -Ye naa koo ngĩ pye, loo na ta laam ga yĩn.

<sup>3</sup> Ye ma syi ye naa yii kihi ye nampyeñ- ne ye! Ye ma syi ye yee yii ga laa pye ye myaha yãã le na ye! -Ye naa yii tege tãã ye ye nampyeñ- yĩnde na! -Ye naa ye nampyeñ yãñ mii u ter ye yaha!

<sup>4</sup> Waa ma syi u naa u ya wĩ ya kar ye! -Ye naa ye nampyeñ- wãyõ wĩ bya kar!

<sup>5</sup> -Ye naa n nii yii ne Yesu Crise laam ter ne.

<sup>6</sup> Yesu Crise tuu sē bii pa wa kãntraha na ye,  
u pye Yãhã tãy,  
ma pye Yãhã wãñ syi kãnkai- bye wo.

U sē yigi ke niisayũhũ wĩ na,  
ma kuee yai tãñ yãhãyiñ na ye.

<sup>7</sup> U koo niisayũhũ nge ge yãã,  
ma ke ta yaha,  
ma ba nii tẽntẽle syi ya draha wo.

U ba nii nawee wãñ syi dyañ,  
ma nii nawee- bye ne wãceñ.

<sup>8</sup> U le sya ma u ya tege tãã ye,  
ma nii n luhu Yãhã ye

ma sya ga gbã yãã le na, fyar gbã trã na.

- <sup>9</sup> Loo ne, Yãhã n u kuã yir ga ta ncaha ye,  
kai- bye yĩŋ na, ma miingbãŋ wãã u kē,  
miingbãŋ gii ke ter myar bye yaha.
- <sup>10</sup> Loo na, yãhãyĩŋfa, kãntrahafa ne,  
tesē kãntraha tããfa ne,  
pe bye yai pe naa kãnklũy gbãã Yesu yaha  
ye.
- <sup>11</sup> Pe bye ga le cã, pe sya le pãã yi pe yee,  
a Yesu Crise woo u ma Yĩŋfua.  
Loo na, Yãhã miingbãŋ ga yi.

*Ye yai ye nii naalɔr wãŋ syi dyaŋ wam wo!*

<sup>12</sup> Ta naambiyãm, cãã gii cãã na tē pye ye tãy,  
ye naa n luhu ra ye yalebye. Yagaa tē wee ye tãy  
ye, ye yai ye gbihi naa n luhu ra ye! Ye yai ye fya  
yigi Yãhã na, ye naa n luhu ke ye! -Ye yii waha  
ye naa ye wãsyayaha wĩ yar gbaa na!

<sup>13</sup> Ye sē yãã, Yãhã ma ke tēn tē ye nsoho wo  
yalebya, ma ga ye ta, ke laam wĩ n tãy ye ye tesē  
ye n naa loo pye.

<sup>14</sup> -Ye naa koo kai- ngĩ bye pye ye kãnkai- bye  
wo! Ye ma syi ye naa n sē laa wo ye! Ye ma syi  
ye naa kaplãŋ tyĩn laa wo ye!

<sup>15</sup> Loo na, kapee laa saa pye ye yĩŋ na ye, ye  
laam ga nii gbegbe, ye ga nii naweeyõm. Ye ga  
nii Yãhã pii driyẽfa laam wo, driyẽfa mpãy pe  
sē n sron ye, ma maha pee. Ye yai ye naa n yehe  
palpal pe laam wo, mii yrompii dyaŋ yãhãyĩŋ na.

<sup>16</sup> -Ye naa n nii pe laam wo koo syi, ye naa  
le kapãn yar pe na, kapãn lii le cĩnde yrã wãã  
nawee kē. Ye ma nii n pye koo syi, ye wĩ ga ba  
ra yĩŋ kuã yir u Yãhã Yĩndefua Crise durbaper.

Loo nde ga ba le yar ta tēn sē yi tēwai ye, n sē fēn ka naa n sya ye.

<sup>17</sup> Tee Yesu ta ye Yater, le ma mii diŋ dyaŋ tē yi Yāhā kē. Laa na, ta ntāŋ bya ga ba woo, ta n ku dye taha koo diŋ nge na. Le ma pye ke dyaŋ, n ga nuhu di le na, n maha nuhu di ye wīi na.

<sup>18</sup> Ye bya, -ye naa nuhu di ra wāŋ syi dyaŋ, tee maha naa nuhu di ra wīi na!

*Timuti ye wīi, Yepaflohodi ne*

<sup>19</sup> N koho taha yaha Yīŋfua Yesu na, u ta ta n Timuti lehe wāā ye fla na plii nde na, u n dur ba ye wīi pāā ra ye, ta laam n yīn.

<sup>20</sup> Woo ya kē u laam ga ra ne wāceŋ, ma maha ye wīi le yaha u laam wo.

<sup>21</sup> U nampyeŋ- bye pe ya wīi ya kar, pe sē Yesu Crise wīi ga ye.

<sup>22</sup> Timuti tuu tēn lii tē ra ne mii dya dyaŋ u tuhufua ne le Yesu kapāyīi wīi na, tesē wāfāy gii bye ke u dye, ye koo ngīi bye yāā yīnde ne, ma cā u sroŋ.

<sup>23</sup> N ma ba laa cā wa ra wīi na, n n yāŋ n u no wāā ye fla na.

<sup>24</sup> N koho taha yaha Yīŋfua na, u ta ndoo ge n ka n ga ye yāŋ plii nde na.

<sup>25</sup> Ma yee wo Yesu kāndeyārwe Yepaflohodi wīi na, u koho le ra ye Yāhā tēn laam wo, ma suhu ra sesrār ne le tēn wīi na. Ye cā, woo kē tee lehe wāā ra ye, u n ba ye diŋ nge wāā ra kē, ma yee ye yii wāā ma koho le ra ye ta fēn wo. Yagaa le yai, n u dur wāā ye kē.

<sup>26</sup> U n traha u ye bye yāā. Tee le luhu ma yee, u sē pye wāwee ye, loo nde u fāy gboho.

<sup>27</sup> U ba yaa cĩnde, ma sya ba kuee wale nen. Yāhā n -sē u fēn di, woo ma suhu ra bya ne. Ye sē yāā, ta laam ba wlāhā. Yāhā ma ne yee ke sē wo fēn di ye, n ga ne ku fēn ne.

<sup>28</sup> Ndoogē n kē n u nō wāā ye kē farfar, ye laam n dur nii nuhu ne. U ma ga yi ye na, le ga nuhu yigi ye kē, ra bye ne.

<sup>29</sup> Loo na, -ye u wāā ye sya cĩnde nuhu di u wādur wīi na ye ye. Ye sē yāā, Yīnfua kāmāy na, u ma ye ne mii tuhufua nen pii dyaŋ. Ye yai ye naa nagboho taha poosyifa na.

<sup>30</sup> Ye sē yāā, u ba yer gbā wāku na u Yāhā Yīndefua Crise tēn kur ye: Diŋ gii tee yi ma yee, yaa koho le ra ye, ye saa ne waha pa ra kē ke ne ye; woo le sya, ma pa ke ne ra kē, ma sya ne ga ba gbā yāā le na.

### 3

#### *Wo ga waha sronj Yesu woo kāmāy na*

<sup>1</sup> Wo nna, yagaa tee ye laam wāā le Yīnfua ne, -ye naa nuhu di loo nde wīi na! Tē lii yrūhū yar wa ye na, n ga maha waha loo wīi nen ya yrūhū yar ye na; loo nde sē wāfāy kua ra ye ye, le ga maha laa yō ye kē.

<sup>2</sup> Napee- mpāy ma pām wāŋ syi dyaŋ, ma pe ya ta Yesu Crise tēntē-. Poo wākūū wīi loo ya ta yīŋ Yāhā kānde wo.

<sup>3</sup> Koho gii ke nawee kūū, ke saha nawee sya yaha ye. Yāhā Yrā Fānga ke -sē tēn lii tē nawee laam wo, loo ne le ga waha u sya yaha. Ye sē yāā, wo Yāhā sey Yāhā Yrā Fānga kāmāy na. Yesu Crise woo, u ma wo ye, wo yīnkuāyir wīi. Wo sē



koho taha yaha nawee- koho kai- ngĩ na ma yee, koo ga waha wo ta, wo n sronj Yāhā yĩnde na ye.

<sup>4</sup> Wii ma yee, nawee koho kai ga waha nawee sya yaha, u cā, ndoo wlaha koo kai- ngĩ wo, ma sya ta ter. Nwa ta ndoo sē -sē ra koho taha yaha koo kai- ngĩ na ye?

<sup>5</sup> -Ye yāŋ, tē see ra plii kuatāā wuhu, pe n ta kūū. Yiisrēfa naa maha kē ra ne, Bēsyaᵐē terfua kē ra ne. Yeberēfa naa kadye kē ra ne, too yor ne tē n pāā. Yiifēe- kānde na, ye cā Farisyē poo kē pe cā loo kānde yigi klue sī; n -sē pye poo ne.

<sup>6</sup> N ba Yiifēe- kānde nde yigi ter klue sī, ma sya naa Yesu kāndeyārfa ke yīntayāhā ne, ma naa pe boo. Kānde lii le ta, wii ma yee le wāyār ga waha nawee ta u n sronj Yāhā yĩnde na, le wāyār fue sē pye ra na ye.

<sup>7</sup> Faale na, n ba naa koo kai- ngĩ bye yāŋ mii kayĩ laa dyaŋ ra ye. Yagaa, u Yāhā Yĩndefua Crise wī ta, n le cā laha ma cā, yīŋ wee ke na ye.

<sup>8</sup> Koo kai- ngĩ, ma suhu kai- nkāy ne nawee- n pye ma yee, Yāhā ga kayĩ wāā pe kē, yīŋ wee koo ngĩ bye na ra ye ye. Tē cā Yesu Crise woo kē ta Yīŋfua, loo le ma yīŋ, ma ter koo ngĩ bye yaha. U wī na, n sē n traha n naa koo kai- ngĩ luhu ye. N ke yāŋ mii kāntraha kafar rii syi dyaŋ pe pē n kāā. N n ke n u Crise yāā,

<sup>9</sup> n nii loho ma n waha yi wo nsoho wo u ne ye. N Yesu Crise ta ra Yater; loo ne, le ra ta ra n sronj Yāhā yĩnde na. Yāhā koo kē, ke ga waha ta nawee wii u Yesu Crise ta u Yater, u sronj ke yĩnde na.

<sup>10</sup> Lii ya tē n ke, n u Crise cā, n maha u fānga cā, fānga gii ke u ta u n yir gbā wo, ma dur ba yrāṅ na gbaafa ye. N maha n ke, n naa wāfāy yāā u ne, n nii nakugu wāṅ syi dyaṅ kapee- wāpyeṅ kue ye, mii tuu ku mii syi dyaṅ trā na.

<sup>11</sup> N koo ngī ke ma yee, ta bya n ba yir gbā wo, n dur nii yrāṅ na.

*-Too naa le wāyī fla ya kar!*

<sup>12</sup> N sē yee n nɔ wa le wāyī fla na ye. Koo yīntaha kē, n sē yee n nii wa nawee wii syi Yāhā ke n ke ye. N -sē nii plāhā, ma fā n gaha le wāyī yāāsaha wo; ye sē yāā, Yesu Crise ra yāā wa.

<sup>13</sup> Wo nna, n sē yee n le wāyī yāā wa ye, aye! Lii tē -sē n pye, loo ne nde: Ta kalaa wee ta faale kai- na ye; lii le ma ra yahasee ye, loo ne tē n kar.

<sup>14</sup> N fā n gaha koo syi le wāyī yāāsaha wo, wāyī lii Yāhā yee too fā ga le yāā yāhāyīṅ na, Yesu Crise kāmāy na.

<sup>15</sup> -Too laantee nen nde yāā, wii mpāy, wo yīntar too Yesu Crise wī na. Ye laam wo, mpāy ma -sē pye, pe laam wī ma le ya ya, Yāhā ga ba le cīnde fla yar pe na gbaa na.

<sup>16</sup> Kānde lii ya wo bye le sya laantee nen ne ma n gaha, ma sya ba waa yagaa na, -too naa n gaha loo ne!

<sup>17</sup> Wo nna, -ye naa n yāṅ ta na! Nawee yai u naa u troho tāhā mii le Yesu kānde wo, wii loo pye ma yee, nawee- bye n yāṅ gbe wo na. Mpāy pe pe troho tāhā koo syi, -ye naa poo yāṅ!

<sup>18</sup> Laa ma tē n pāā ye ye yalebye. N nwo, tē maha le pāā ye ye yagaa yīntām ge ne: Nawee-busāā mpāy ma, u Yāhā Yīndefua Crise tuu ku

trã na lii na, pe loo sye, ma sya pe ya ta loo nde napĩ-.

<sup>19</sup> Pe n gaha pe ya wĩ klahasaha wo. Ye sã yãã, pe sã laa gε wũ Yãhã kuε ye mii pe laha wĩ sã ne ye. Lii le yai le nii pe ye fyar wĩ, loo le ma pe ye yĩkuãyir wĩ. Tesã driyẽ wãn ya ne, poo pe n kar.

<sup>20</sup> Ma sã yee, wii poo na, wo niisaha ma Yãhã tãy! Wo Syayahafua wii u ma wo Yĩnfua Yesu Crise, wo u wãdur sãn, u dur ba farfar.

<sup>21</sup> Fãnga gii ke ma u ye, u n ga waha nii wãn byε yĩn na, u ga ba koo fãnga ta, u wo driyẽ kadye napõrge nge wã klaha ta, ke n nii woo kadyeyũhũ wãn syi dyan, woo kadye gii wãklahayãã wee ke na ye.

## 4

### *Kayar fla*

<sup>1</sup> Wo nna, loo ne, ye yai ye yii plãhã ye troho wãtãhã ne. Ye sã yãã, ye ntãn dye ra tãy. Ye wãyãã wĩ gboho ra laam wo. Ye ra laam yĩn. Ye wĩ ma kayĩ lii tã yãã ta tãn kur ye. Ye wĩ ma yĩkuãyir wĩ ra ye. Tee yai ye yii plãhã ye troho wãtãhã ne Yesu wĩ ne mii, n ga loo nde yar ye na.

<sup>2</sup> Yewudihi ma suhu Sentihi ne, yii ca syãm mii, n ga ye nar waha nde ne: Ye yai ye yĩmbuhu wãã le, ye nii yĩmbui nen na. Ye wee la mii cĩfua dyan lefua ne Yĩnfua kãmay na?

<sup>3</sup> Mboo wii taa -sã ma ra tẽntẽwaibua, n ma nar ma koho le pe ye. Ma sã yãã, pe pye ra ne te sesrãr na le Yesu kapãyĩ wãpãã wĩ na nawee-ye, poo ma suhu Klemaa ne tesã mpãy byε ne pe

pye ra ne le tēn laam wo. Pe myar yrūhū wa u cīinde yrā yāāfa saba laam wo.

<sup>4</sup> Tee ye laam wāā le Yīnfua ne, -ye naa nuhu di loo nde wīī na! Ye sē luhu la? -Ye naa nuhu di loo nde wīī na!

<sup>5</sup> -Ye naa n tāy nawee- bye ne! Yīnfua ga dur ba yagaa.

<sup>6</sup> Ye ma syi ye naa ntāŋ cēr laa ne ye! Le ma nii laa dyaŋ, ngii wīī ma pye ye na, -ye le pāā Yāhā ye, ye ke nar le ne! Ya'a lii nar Yāhā ye, -ye ke syaha taha le na!

<sup>7</sup> Ye ma nii n pye ke syi, yrīŋ mpāy Yāhā ga wāā ye kē, pe ga Yesu Crise wīī ta le n nii gbāā ye laam wo, ye n nii ye saa naa laam yigi laa ge ne ye.

<sup>8</sup> Wo nna, lii le kuee, ta n ye yar le ne: Kai- nkāy ke yō, ma maha yai pe naa ke sey, -ye ye laam bye yaha koo na; koo kē, cīinde wūhū ne, tesē kai- nkāy ne nawee- nagboho ta ke na, tesē kai- nkāy ne ke sroŋ, ma maha laha, ma yō nawee- ye, ma ma yīnkuāyir wūhū.

<sup>9</sup> Tē ye klaha ma ye yar kai- nkāy ne, -ye naa n pye koo syi! Tee kai- nkāy luhu ra yē na, ma suhu kai- nkāy ne tee ra yāā pyesaha wo, -ye naa n pye koo syi! Loo na, Yāhā -sē ga pye ye ne, Yāhā gii ke yrīŋ wāā nawee- kē.

*Pɔl syaha wāā Filipefa kē pe diŋ wīī na u kē*

<sup>10</sup> N nuhu busāā yāā Yīnfua kāmāy na, tee waha le yar ra na yagaa ma yee, ta wīī gboho ye laam wo. N ba cā ye sē ba ra wīī faha ye, pyesaha koo ke sē ba yāā ye na ye.

11 Le sē nii mii fen ma ra na, koo ra n pāā ke syi ye. -Ye yāŋ, tē ma fen tii syi wo yagaa, n te yē nder wa, laa gε saha sye ra ye ye.

12 N ga waha nii yigi fen laam wo, n ga maha waha nii yigi nangbān laam wo. Teebehe bye wo, n nii wāyigi cā, fāā wo tesē wādiyai ne. Kla ma ra ye busāā woo, kla ma ra ye car ya woo, n kacān yāā ma nii wāyigi cā.

13 N ga waha yia koo ngī bye na Yesu Crise kāmāy na, woo wii u kaa taha ra fānga na.

14 Tee -sē ra fen di, ye le pye yō.

15 Cāā gii cāā na pe ba fe yir le Yesu kapāyī wāpāā ne nawee- ye, ta n yir Maseduan kāntraha na, ma n tay kui wo, yii gε le cā laha ma yee, ye Yesu kāndeyārfa yawāhāfa ya me pe koho le ra ye. Tē naa le kapāyī pāā nawee- ye, yii ya me tee le wāyī dur ra kē, ma koho le ra ye.

16 Tē pye Tesaloni wo, ngii wī ke pye ra na, ye koho le ra ye, ma ke kla nō wāā ra kē. Ye loo pye ke ter tehe nen yaha.

17 Le sē nii mii n n ke ye naa koho le ndoo ya ye wāleŋ ya ye. Lii loo tē n ke, ye Yesu wāta ye Yater wī n waha ye ta, ye n naa kayī pye. Loo na, ye n waha kayī yāā Yāhā ye busāā.

18 Āwā, tee ngii nō wāā ra kē, n ke bye yāā. Ke yai ra ye ma sya ta ter. Yagaa, Yepaflohodi tuu pa wa ye kohole kla ne ra kē, ngaa wī sē maha wee ra na ye. Ye kohole kla wī n tāy Yāhā ye, ke ma mii diŋ kla gii syi dyaŋ ke dugu n tāy Yāhā ye, ke n ke sya.

19 Wān tii wī te ma ye na, wangbāy le ma Yāhā ye mii syi dyaŋ, ke ga ba te bye wāā ye kē koo

syi, Yesu Crise kāmāy na mii ke le pye ra kē mii syi dyaŋ. Loo wangbāy nde, kacān wee le nayōr na ye.

<sup>20</sup> Wo Tuhufua Yāhā miingbāŋ yai ke naa n gboho yalebye, wāyeryāā ma n pye le na ye. Amen, le nii ke syi.

*Kuasaha fla, syaha ne*

<sup>21</sup> Nawee- mpāy pe ma Yāhā wām, -ye pe bye syar Yesu Crise myaha na! Yesu kāndeyārfa mpāy pe ma wo ne nwo, pe ye syar.

<sup>22</sup> Nawee- mpāy bye pe ma Yāhā wām, ma ma nwo, tesē mpāy ge ne pe ma u fāngafa bye yīŋfua kangbāŋ wo, pe bye ye syar.

<sup>23</sup> Yāhā, ke Yesu Crise laantār wī pye ye bye kē!

**YĀHĀ NAAMBIYĀRFĀN SABA**  
**Karaboro, Eastern: YĀHĀ NAAMBIYĀRFĀN SABA**  
**New Testament**

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

---

PDF generated using Haiola and XeLaTeX on 18 Apr 2025 from source  
files dated 29 Jan 2022

15120496-00e2-503a-8d40-2d7cfdc1ba5b